



Mahein Nia Lian Nú. 54, 19 Juñu 2013

Baze Dezenvolvimentu Infra-estrutura: Dalan Naruk Ba Karakteristika Polisia Nasional

“Estudu Kazu iha Komandu Distrital:
Bobonaro, Aileu, Liquisa, Baucau, Covalima, Oe-Cusse no Lautem”

Introdusaun

Temi tiha ona iha dokumentu planu dezenvolvimentu seitor siguransa “Vizaun 2030” dezenvolvimentu area siguransa nian ne’ebé difini katak dezenvolvimentu husi faze ida ba faze seluk maka *Premeiru* (2011-2015) hametin no konsilida baze. *Segundu* (2016-2020) habelar no dezenvolve siguransa interna. *Terseiru* (2021-2025) hametin baze ba paz no estabilidade. *Kuartu* (2026-2030) serbi diak liu comunidade.¹ Iha faze premeiru Governu halo investimentu ba infra-estrutura baziku nu’udar kondisaun minimu ba Polisia Nasional Timor-Leste (PNTL) atu nune’e fasilita diak liu serbisu polisia nian.²

Monitorizasaun Fundasaun Mahein (FM) nian iha Komandu Distrital sira, infra-estrutura sai hanesan dezafiu ba serbisu PNTL nian. Husi Komandu Distrital sira ne’ebé FM vizita mosu preokupasaun hanesan husi elementu PNTL sira. Komandu Distrital sira ne’ebé vizita maka hanesan Komandu Distrital Bobonaro, Aileu, Liquisa, Baucau, Covalima, Oe-Cusse no Lautem.

La’os buat foun ida wainhira elementu PNTL sira preokupa kona-bá infra-estrutura ba PNTL ne’ebé instituisaun ne’e infrenta iha tinan sanulu resin tolu nia laran. Situasaun ida ne’e hakait ba komponente hotu dezenvolvimentu infra-estrutura Timor-Leste nian ne’ebé seitor hotu-hotu iha dezenvolvimentu Timor-Leste nian prioridade hotu.

Kestaun infra-estrutura ne’ebé instituisaun PNTL infrenta lori mos rezultadu kolokasaun ba elementu PNTL sira tuir ida-idak nia distritu. La’os elementu hotu maibe maioria maka fila ba sira nia distritu rasik ne’ebé sira bele besik iha Komandu Distrital no Estasaun Polisia Sub-distritu sira. Nune’e mos elementu PNTL sira bele hela iha sira nia uma ba serbisu maibe la’os elementu hotu maka iha uma ne’ebé besik ho sira nia edifisiu.

Metodolojia

Metodolojia ne’ebé adopta iha peskiza ne’e bazeia ba entrevista no observasaun direta ne’ebé hala’o iha Komandu Distrital sira. Fontes entrevista maka hanesan Komadante Distritu sira no elementu PNTL sira ne’ebé koloka iha distritu refere inklui comunidade sira. Komandu Distrital ne’ebé FM hala’o nia estudu maka hanesan Bobonaro, Aileu, Liquisa, Baucau, Covalima, Oe-Cusse no Lautem ne’ebé hahu husi Fevereiru 2013 to’o Juñu 2013.

¹ Edisaun 1. Seguransa: Media informasaun no Komunikaun, Sekretaria Estadu ba Siguransa. Outubru 2010.p14

² Relatoriu Fundasaun Mahein, Mahein Nia Lian Nú. 21, Dezenvolvimentu Polisia Nasional Timor-Leste (PNTL). 21 Jullu 2011.

Preokupasaun Komandu Distrital – Baze ba Infra-estrutur

Iha FM nia monitorizasaun to'o tinan klaran 2013 hare katak konstrusaun ba edifisiu Komandu Distrital sira hahu konstrui no edifisiu iha estasaun polisia sub-distrital sira finaliza ona no utiliza ona ba serbisu PNTL nian ne'ebé tama iha pakote dezenvolvimentu sira iha Orsamentu Jeral Estadu (OJE) nian iha tinan 2012 ba kotuk.

Maibe mosu preokupasaun iha Komandu Distrital sira ne'ebé FM vizita hanesan kazerna no bairu ba PNTL nu'udar dezafiu ida wainhira elementu PNTL koloka ba fatin serbisu no dalabalu la halo serbisu iha tempu tomak tuir ordem ne'ebé haruka. Tanba elementu PNTL sira tenki la'o dook husi sira nia hela fatin ka sira nia uma ba fatin ne'ebé elementu ne'e koloka ba.³

Inisiativa no solusaun ba problema ne'ebé elementu PNTL hasoru maka sira disidi ba hela ho familia ruma no aluga uma ne'ebé besik iha sira nia edifisiu. Ezemplu, iha elementu balu husi sub-distritu ida halo serbisu iha sub-distritu seluk, ikus sira tenki aluga uma hodi hela.

Preokupasaun hanesan hato'o husi Komandu Distrital sira katak iha ordem serbisu Komandante Distritu dezeña planu operasaun iha nivel komunitaria tuir mandatu polisiamentu nian maibe buat ne'ebé akontese dalabarak polisia ba vizita deit no mosu konfliktu ruma entre comunidade intervensaun polisia nian dalaruma tarde. Hakait mos husi limitasaun sira hanesan transporte no komunikasaun ba PNTL sira iha distritu.⁴

Iha kazu seluk ne'ebé Komandu Distrital sira relata, inisiativa sira ne'ebé halo hanesan implementasaun "Polisiamentu Komunitaria" integrasaun polisia iha comunidade nia leet ne'ebé polisia bele aprosima diak ho comunidade no involve iha atividade komunitaria nian. Maibe sai hanesan dezafiu maka hela fatin ba elementu PNTL sira, maske elementu balu koloka ona ba suku sira.

Fundasaun Mahein (FM) iha entrevista ida ho Komandante Distrital Lautem Superintendente Olavo Cristovão hatete:

*"Iha tinan 2013 Komandu Distrital Lautem planeia ona atu integra atividade PNTL iha komunidadde nia leet liu husi serbisu "Polisiamentu Komunitaria" no hanoin katak polisia bele serbisu hamutuk ho comunidade inklui serbisu sira seluk hodi aprosima diak ho comunidade nu'udar pratika prevensaun konfliktu. Maibe hela fatin ba elementu PNTL sira iha suku maka sai hanesan dezafiu ba implementasaun atividade hirak ne'e."*⁵

Kazu hanesan hato'o mos husi Segundu Komandante Distrital Liquisa Superintendencie Asistente Nicolau Francino da Costa hatete:

"Hela fatin ba elementu PNTL Komandu Distrital Liquisa, elementu sira hela iha sira nia uma rasik tanba seidak iha kazerna ba PNTL sira iha Komandu Distrital sira, nune'e mos iha

³ Observasaun Fundasaun Mahein (FM) nian Komandu Distrital hitu maka hanesan Aileu, Bobonaro, Baucau, Covalima, Liquisa, Lautem no Oe-Cusse, hahu husi Feveireu to'o Juñu 2013.

⁴ *Ibid.*

⁵ Entrevista ho Komandante Distritu Lautem, Superintendente Olavo Cristovão. Iha Komandu Distrital Lautem, loron 12 Juñu 2013.

*Komandu Distrital Liquisa rasik, ho ida ne'e elementu sira hela iha sira nia uma hafoin ba halo serbisu.*⁶

Relata mos husi Komandante Distrital sira seluk ne'ebé Fundasaun Mahein vizita, maka kazerna ba elementu PNTL sira, dalabarak sira iha iniciativa atu halo serbisu ne'ebé Komandu Distrital dezeña ona maibe sai preokupasaun maka hela fatin ka kazerna nu'udar kondisaun minimu, inklui fasilidade sira hanesan transporte no komunikasaun.⁷

FM hare katak situasaun sira ne'e bele implika mos kareira polisiamentu nian tanba polisia husi distritu ne'ebé hanesan, serbisu iha nia distritu rasik sei fo impaktu no kria problema rasik ba sira nia kareira. Tanba karateristika sosial iha sosiedade Timor-Leste, iha kultura familia ne'ebé forte baze ba relasaun husi tradisaun uma kain nian, familia fetosan-umane no pratika sosial sira seluk. Nune'e lori to'o iha atuasaun PNTL nian iha konflitu ka disputa ruma entre komunidadade, dalabalu iha tendensia ba familia ne'ebé bele hamihis lei no ordem nia forsa iha pratika polisiamentu nian.

FM nia monitorizasaun iha Komandu Distrital hitu ne'ebé iha teritoriu Timor-Leste, la'os buat hakfodak ida maibe kultura sosiedade Timor-Leste nian, dalabarak Timor oan sira hetan malu ka familia ne'ebé mai husi "Lian" ne'ebé hanesan dalabarak sira ko'alia sira nia lian rasik, ezemplu komunidadade "Mambae" hasoru malu ko'alia Mambae ba malu inklui komunidadade sira seluk. Situasaun ida ne'e iha FM nia monitorizasaun hare katak iha Komandu Distrital ne'ebé FM vizita "Lian Inan" sai hanesan lian komunikasaun entre elementu PNTL sira tanba sira husi distritu ne'ebé hanesan no lian ne'ebé hanesan. Hanesan iha Komandu Distrital Lautem elementu PNTL sira husi Lautem oan rasik, iha sira nia edifisiu ko'alia lian Fataluku ba malu nune'e mos iha Komandu Distrital Liquisa elementu PNTL sira komunika ba malu ho lian Tokodede, inklui Komandu Distrital sira seluk ne'ebé FM vizita.⁸

Buat hirak ne'e hotu nu'udar situasaun ne'ebé Komandu Distrital sira infrenta hanesan kazerna ba PNTL sira seidak iha, ikus desizaun ne'ebé Komandu Jeral hasai ba kolokasaun elementu PNTL sira tenki fila fali ba sira nia distritu rasik. Maske iha razaun seluk bele justifika katak "fila ba sira nia distritu rasik tanba sira maka hatene liu karateristika komunidadade nian iha distritu ida-idak nian" maibe bele iha mos kondisaun seluk bele hamosu situasaun ne'ebé hakat liu lei no ordem. Tanba komunidadade Timor-Leste iha kultura familia ne'ebé forte no implika mos ba serbisu ne'ebé sira hala'o.

Karakter Sosial no Konflitu Sosiedade Timor-Leste

Sosiedade Timor-Leste iha kultura familiarismu ne'ebé forte baze ba relasaun sosial iha tradisaun Timor-Leste nian. Iha relasaun sira husi jersaun ba jersaun, relasaun husi tradisaun fetosan-umane, familiariza ho kolega ka belun no pratika sosial sira iha sosiedade nia leet.

⁶ Entrevista FM ho Segundu Komandante Distrital Liquisa Superintendente Asistente Nicolau Francino da Costa. Iha Komandu Distrital Liquisa, laron 20 Feveiru 2013.

⁷ Entrevista Fundasaun Mahein (FM) ho Komandu Distrital hitu maka hanesan Aileu, Bobonaro, Baucau, Covalima, Liquisa, Lautem no Oe-Cusse, hahu husi Feveiru to'o Juñu 2013.

⁸ Observasaun Fundasaun Mahein (FM) nian Komandu Distrital hitu maka hanesan Aileu, Bobonaro, Baucau, Covalima, Liquisa, Lautem no Oe-Cusse, hahu husi Feveiru to'o Juñu 2013.

Nune'e hakait mos ba konflitu ne'ebé akontese iha sosiedade Timor-Leste dalabarak hakait ho problema sosial sira, kultural no ekonomiku. Komandu Distrital hitu iha teritoriu Timor-Leste tomak relata maioria kazu ne'ebé akontese iha distritu ida-idak kuaze hanesan. Kazu hanesan haksasuk malu rai, natar, to'os no haksasuk malu plantasaun. Problema seluk ne'ebé baze ba uzu kustume no tradisaun fetosan – umane nian hakait to'o relasaun sosial sira iha komidade, baku malu tan tua lanu, violensia domestika, odiu malu tan moris sosial no ekonomiku nian.⁹

Modalidade relasaun kultura sosiedade nian no konflitu ne'ebé akontese hakait ho lisan no tradisaun sira no konflitu ne'ebé akontese sei hamaluk hela ho relasaun sosial sira iha komidade. Konflitu baze ba disputa rai ne'ebé rai iha sosiedade Timor-Leste barak maka mai husi rai komunal sira, rai adat no konflitu sira baze relasaun sosial sira ne'ebé la konsege rezolve iha nivel familia ikus monu ba violensia ne'ebé presiza intervensaun autoridade polisial nian.

Buat hirak ne'e sei fo impaktu no potencia ba polisia hodi dudu sees tiha lei no ordem, tanba polisia ne'ebé mai husi komidade ne'e rasik no iha relasaun familia baze tradisaun no kultura sosiedade nian. Ne'ebé iha Timor-Leste, ita hare katak familia iha sosiedade Timor-Leste familia ne'ebé mai husi jersaun ida sei iha ligasaun ho familia jersaun seluk, sei hakait ho kustume fetosan-umane ne'ebé hare katak familia iha Timor-Leste familia boot iha estrutura sosial nian no pratika kultural sira.

Asuntu seluk ne'ebé FM hare katak iha potencia konflitu iha komidade Timor-Leste nian maka "Odiu" ne'ebé ikus-ikus ne'e konflitu mosu tan odiu malu. Odiu malu tan haksasuk malu rai, plantasaun, animal hakiak, laran moras ba familia no pesoal seluk tanba kondisaun sosial no ekonomiku familia seluk.¹⁰ FM hare katak kondisaun hirak ne'e sei fo impaktu ba kareira polisiamentu nian ne'ebé lolos kareira implementasaun lei no ordem ikus dudu sees tiha lei no ordem, tendensia liu ba familia.

Impaktu ba Kareira Polisiamentu

Realidade durante ne'e polisia maka hamosu problema rasik ba sira nia profesionalismu hanesan polisia ne'ebé hatur lei no ordem. Sei fo impaktu ba atusaun karik mosu problema iha komidade nia let. Dala barak komidade hasoru problema ruma hetan atusaun ne'ebé la neutru tanba elementu PNTL ne'e rasik sei iha ligasaun familia.

Situasaun ne'e rasik mosu tanba kondisaun ne'ebé maka minimu PNTL sira hasoru durante ne'e hanesan kazerna ka bairu polisia ne'ebé maka seidauk iha, obriga komandu PNTL atu koloka ka halo rotasaun ba elementu PNTL tuir sira nia orijinalidade, hanesan koloka elementu PNTL tuir sira nia moris fatin.

⁹ Entrevista Fundasaun Mahein (FM) ho Komandu Distrital hitu maka hanesan Aileu, Bobonaro, Baucau, Covalima, Liquisa, Lautem no Oe-Cusse, hahu husi Feveireiro to'o Juñu 2013.

¹⁰ *Ibid.*

Kolokasaun ka rotasaun elementu PNTL tuir distritu idak-idak nia tanba sira maka hatene liu kultura no karakteristik a iha sira nia distritu rasik ho nune'e wainhira ba halo sira nia knaar nu'udar polisia fasil ba sira atu kolabora ho komidade iha fatin refere.¹¹

Iha lidun seluk kolokasaun hanesan mensiona iha leten sei hamosu problema seluk ba Institusaun PNTL ne'e rasik tanba dala barak membru PNTL ne'eba maka halo atusaun ba konfliktu ruma la neutru tamba sei iha relasaun familia. Iha kazu seluk ne'eba maka PNTL Distritu Bobonaru hasoru katak, dala barak mosu konfliktu no problema ruma husi suku balu membru PNTL sira ne'eba maka mai husi fatin refere la koho tun ba halo atusaun entaun hamosu problema ba institusaun polisia rasik.

Hanesan problema akuntese iha Suku Bunak Distritu Bobonaro Komandante Distritu tenki identifika uluk polisia sira husi suku seluk hanesan Suku Kemak maka tenki tun ba halo intervensaun, se lae ema hirak ne'e baku malu hela mais elementu PNTL sira mos tauk hotu tanba sira nia familia iha ne'eba. Tanba wainhira sira halo kapturasaun ba suspetu hirak ne'e ema bele asalta fali sira nia familia entaun sira mos tauk.

Entaun dala barak mosu problema iha Distritu Bobonaro Komando Distritu tenki identifika uluk elementu PNTL sira ne'e husi suku seluk maka tun ba halo atusaun hanesan Suku Bunak maka hamosu problema entaun Komandante Distritu tenki identifika lalais iha situasaun emerjensia nia laran hodi haruka PNTL husi Suku Kemak maka tun ba halo atusaun ho brani.¹²

Entaun relasaun familia ne'e sei impede rasik prosesu atusaun ba kazu ka krime ne'eba maka mosu iha fatin refere ka dala ruma mos relasaun familia. Tanba sira nia maluk maka halo problema dalaruma sira tun ba la halo atusaun tanba sei iha relasaun familia ne'eba maka metin entaun ne'e sei fo problema ba institusaun PNTL ne'eba maka hatur lei no ordem.

Oinsa Atu Sai Karakter Polisia Nasional?

Atu hamosu polisia ida ho karakter polisia nasional ba futuru tenki halo rotasaun ba elementu PNTL sira ho durasaun tuir tempu ne'eba maka determina ona. Hakarak ka la koho elementu PNTL tenki prantu kualker tempu atu halo rotasaun no muda ba ne'eba deit atu halo sira nia knaar nu'udar Polisia Nasional Timor-Leste.

Nu'udar membru PNTL no ofisial komandu la iha argumentu no la iha razaun atu kontra orden ne'eba maka fo husi komandu atu koloka sira iha ne'eba deit. Kolokasaun hirak ne'e mos hanesan serbisu foun atu dezafia sira buka hatene no hasa'e mos sira nia kapasidade iha serbisu polisiamentu nian iha distritu no mos iha nasional.¹³

Maibe atu realiza buat hirak ne'e diak Governu tenki kria uluk kondisaun ba sira wainhira atu implementa rotasaun ba elementu PNTL sira. Kondisaun hirak ne'eba importante tebes maka hanesan bairu polisia (kazerna PNTL). Bairu polisia importante atu elementu polisia

¹¹ Intervista ho Bispo Maliana Dom Alberto do Amaral iha nia rezidencia Maliana, 29 Marsu 2012.

¹² Intervista ho Komandante Distritu Bobonaro Superintendente Joao Belo iha Sub Distritu Maliana Dia, 27 Marsu 2012.

¹³ Ibid.

sira hela, tanba kazerna la iha sei empede elementu PNTL ne'ebé maka halo rotasaun. Tamba ho salariu ida ne'ebé minumu sira tenki buka uma seluk atu aluga, entau bele hamosu tentasaun ba elementu PNTL atu halo serbisu kontra bandu atu hetan osan hodi bele halo sira nia moris loro-loron nian.

FM nia monitorizasaun iha Komandu Distrital hitu, Komandante Distrital sira relata katak dalabarak elementu PNTL sira ne'ebé transfere ka halo rotasaun husi distritu ida ba distritu seluk nu'udar dezafiu maka hela fatin ka kazerna ba PNTL, kondisaun hirak ne'e preojudika mos prosesu transferensia no rotasaun ba elementu PNTL sira.¹⁴

Kazu hanesan hato'o husi Komandante Distrital Lautem Superintendente Olavo Cristovão hatete:

"Komandu Distrital Lautem iha tinan 2013 ba kotuk simu tranferensia elementu PNTL balu ne'ebé transfere husi Komandu Distritu seluk maibe elementu ne'e labele kontinua serbisu iha Lautem tanba hela fatin la iha."¹⁵

Tanba ne'e kondisaun ba elementu PNTL no Komandante Distritu hotu-hotu presiza iha, wainhira sira atu koloka ba iha ne'ebé nune'e sira la bele aluga uma, presiza iha kondisaun ida hanesan kazerna ba PNTL. Hodi nune'e karik iha rotasaun ruma ba elementu PNTL sira bele haruka ba serbisu iha distritu seluk ne'ebé la'os sira nia moris fatin. Atu hatudu katak PNTL sai duni polisia nasional.

Saida maka Governu presiza halo? Tenki halo estudu no halo preparasaun ne'ebé diak antes halo rotasaun ba elementu PNTL no Komandante Distritu sira atu la bele impede sira nia serbisu. Planu hirak ne'e tenki bazeia ba kondisaun ne'ebé maka polisia iha distritu no sub-distritu sira infrenta hanesan kazerna ka bairu polisia.

Preparasaun sai hanesan meus importante atu faselita elementu PNTL ne'ebé maka halo sira nia knaar iha distritu seluk, dala barak membru PNTL ne'ebé maka halo rotasaun sei hasoru difikuldade boot ba sira nia an tanba kondisaun ne'ebé maka la primiti hanesna uma la iha atu hela. Entau sira tenki ba aluga comunidade sira nia uma hodi hela ba iha parte ida ne'e sei fo impaktu direta ba elementu PNTL nia serbisu ho nia moris.¹⁶

Tamba salariu ne'ebé maka elementu PNTL ne'e hetan la sufisienti atu aluga uma, tentasaun bele halo elementu PNTL sira serbisu la masimu. Kondisaun obriga sira bele halo fali serbisu seluk (*sampingan*). Serbisu *sampingan* ne'e bele diak no bele la diak, maibe dala barak serbisu *sampinga* ne'ebé maka akontese katak membru PNTL sira ba fo suporta jogu ilegal sira hodi hetan osan sustenta sira nia moris.¹⁷

¹⁴ Entrevista Fundasaun Mahein (FM) ho Komandu Distrital hitu maka hanesan Aileu, Bobonaro, Baucau, Covalima, Liquisa, Lautem no Oe-Cusse, hahu husi Feveiru to'o Juñu 2013.

¹⁵ Entrevista FM ho Komadante Distritu Lautem, Superintendente Olavo Cristovão. Iha Komandu Distrital Lautem, loron 12 Juñu 2013.

¹⁶ Entrevista Fundasaun Mahein (FM) ho Komandu Distrital hitu maka hanesan Aileu, Bobonaro, Baucau, Covalima, Liquisa, Lautem no Oe-Cusse, hahu husi Feveiru to'o Juñu 2013.

¹⁷ Entrevista ho coordenador PDHJ Sub Distritu Maliana Sr. Janeiro dos Santos Pereira iha Sucu Holas Maliana dia, 30 de Marsu 2012.

Konkluzau

Prosesu dezenvolvimentu Polisia Nasional Timor-Leste (PNTL) ne'ebé durante ne'e la'o iha tendensia la'o sees husi karakteristika polisia nasional, hahu inisiu wainhira PNTL hari'i, iha Governu trazisaun nian ne'ebé hahu iha limitasaun oin-oin iha momentu tranzisaun nia laran. Hahu kolokasaun elementu PNTL, ida-idak tuir sira nia moris fatin tan seidak iha infra-estruturá ne'ebé naton iha distritu sanulu resin tolu (13), ikus kolokasaun elementu PNTL sira tuir ida-idak nian distritu ka moris fatin.

Buat fundamental ida maka baze dezenvolvimentu infra-estruturá nian ne'ebé Instituisaun PNTL hamrik tinan sanulu resin tolu (13) ona maibe sei mukit hela ba infra-estruturá ne'ebé implika mos ba kolokasaun no transferensia elementu PNTL sira. FM relata tiha ona iha relatoriu dahuluk iha tinan 2011 kona-bá dezenvolvimentu PNTL nian katak presiza apoiu infra-estruturá ba instituisaun ne'e. Tanba dalabarak públiku no polítiku sira kestiona kona-bá profesionalismu PNTL nian maibe FM hare katak ita obriga PNTL serbisu ho profesional iha limitasaun nia laran.

Ikus, PNTL kria rasik problema ba nia an tanba kolokasaun elementu PNTL tuir ida-ida nia distritu ka moris fatin. Situasaun sira ne'e hamosu problema ba Komandu Distritu no elementu PNTL rasik tanba la halo atuasaun ne'ebé masimu hasoru konfliktu ka krime ne'ebé maka akontese iha sira nia distritu. Buat hirak ne'e akontese tanba elementu PNTL ne'e sei iha relasaun familia no relasaun sira tuir tradisaun no pratika sosial no kultural iha sosiedade Timor-Leste.

Konsekuensia husi ida ne'e ita bele hare katak sei hamihis públiku nia fiar ba instituisaun siguransa - PNTL. Tanba ne'e, Governu tenki ezejuta programa ne'ebé hatur tiha ona iha "Planu Estratejiku Dezenvolvimentu Nasional – PEDN" ne'ebé difine faze inisiu nu'udar faze investimentu ba infra-estruturá baziku nu'udar kondisaun minimu ba PNTL. Ida ne'e bele fornese kondisaun baziku hanesan "kazerna" ba elementu PNTL hodi halo rotasaun ka kolokasaun ba elementu PNTL no Komandante Distrital sira tuir fatin destakamentu ne'ebé Komandu Jeral orienta.

Buat hirak ne'e atu realiza ho diak Governu no Institusaun PNTL tenki kria uluk kondisaun ne'ebé diak ba institusaun PNTL wainhira sira ba halo sira nia knáar hanesan elementu polisia nasional nian. Kondisaun hirak ne'e hanesan kria kazerna ka bairu polisia hahu husi nasional, distritu no sub-distritu atu iha rotasaun husi nasional ba distritu no husi distritu ba nasional, elementu PNTL ne'ebé maka hetan rotasaun sei halo sira nia knáar ho diak tanba la iha preokupasaun ba sira.

Rekomendasaun FM

1. Governu liu husi Sekretaria Estadu Siguransa (SES) presiza kria kondisaun minimu infra-estruturá hanesan kazerna ka bairu polisial ba PNTL, nune'e la bele impede knáar polisial nian, hanesan halo rotasaun ka transferensia ba elementu PNTL ruma iha nivel nasional, distritais to'o sub-distritu inklui postu polisia iha suku.
2. Rekomenda ba SES no Komandu Jeral PNTL atu hamosu hikak Karakteristika Polisia Nasional liu husi dalan investimentu ba infra-estruturá Instituisaun PNTL nian,

ne'ebé ita hare katak polisia hela iha distritu orijem sei hamosu mos problema sira baze ba sira nia atuasaun tendensia liu ba familia ka sei la halo serbisu ne'ebé masimu tan sei iha bareira familia, ikus dudu sees tiha lei no ordem.

3. Rekomenda ba SES no Komandu Jeral PNTL presiza hasa'e kapasidade ba elementu PNTL liu husi formasaun lei no direitus umanus nian ho baze polisiamentu nian ne'ebé konsagra tiha ona katak polisia maka simu knáar ezelesaun lei no ordem iha atuasaun hotu-hotu ne'ebé PNTL ezelesaun ne'ebé separa relasaun familia ho knáar polisia nian.

Bibliografia

Entervista

Entervista FM ho Komadante Distritu Lautem, Superintendente Olavo Cristovão. Iha Komandu Distrital Lautem, lora 12 Juñu 2013.

Entervista FM ho Segundu Komadante Distrital Liquisa Superintendente Asistente Nicolau Francino da Costa. Iha Komandu Distrital Liquisa, lora 20 FEVEREIRU 2013.

Entervista FM ho Segundu Komadante Distritu Aileu, Superintendente Asistente Sebastião Alves Quintão. Iha Komandu Distrital Aileu, lora 19 FEVEREIRU 2013.

Entervista FM ho Komadante Distritu Oe-Cusse, Superintendente Arnaldo J. A. C. Araujo. Iha Komandu Distrital Oe-Cusse, lora 01 Juñu 2013.

Entervista FM ho Komadante Operasaun Distritu Covalima. Iha Komandu Distrital Covalima, lora 02 Maiu 2013.

Entervista FM ho Komadante Distritu Bobonaro Superintendente Joao Belo iha Sub Distritu Maliana Dia, 27 Marsu 2012.

Entervista FM ho koordenador PDHJ Sub Distritu Maliana Sr. Januario dos Santos Pereira iha Suku Holsa Maliana, iha lora 30 Marsu 2012.

Entervista FM ho Bispo Maliana Dom Alberto do Amaral iha nia rezidencia Maliana, 29 Marsu 2012.

Relatoriu

Edisaun 1. Seguransa: Media informasaun no Komunikaun Sekretaria Estadu ba Siguransa. Outubru 2010.

Relatoriu Fundasaun Mahein, Mahein Nia Lian Nú. 21, Dezenvolvimentu Polisia Nasional Timor-Leste (PNTL). 21 Jullu 2011.